

范太史集

二十

詳校官庶吉士臣何道沖

檢討臣何思鈞覆勘

總校官進士臣楊懋珩

校對官中書臣嵇承志

謄錄監生臣蔣錦城

欽定四庫全書

范太史集卷五十一

宋 范祖禹 撰

皇族墓誌銘

昭信軍節度處州管内觀察處置等使檢校司

空開府儀同三司贈太師追封崇王謚孝溫
墓誌銘

王諱宗瑗字君玉太宗之曾孫魯恭靖王之孫濮安懿
王第十三子英宗之弟也嫡母王三夫人王氏韓氏任

氏所生母耿氏以王貴封德國太夫人仁宗賜名補右
監門率府副率歷左清道率府率右監門衛將軍右領
軍衛大將軍右驍騎大將軍龔州刺史治平中英宗謂
輔臣曰朕自即位罕見都兄弟心實慊然宜以正官奉
內朝冀時得顧視遷真州團練使神宗踐阼遷憲州防
禦使改邕州觀察使三夫人改葬濮園王護喪如禮還
拜鎮寧軍節度觀察留後王兄濟陰郡王薨神宗臨奠
因詣濮王祠堂王與昆弟序班祠下神宗勞問甚悉遂

下詔曰因謁濮祠顧瞻諸伯叔父形容齒髮皆非昔日
深用惻然除崇信軍節度使封漢東郡王今上嗣位授
昭信軍節度使檢校司空開府儀同三司王性沈靜喜
愠不形於色器質渾厚容止莊肅雖疎賤必冠帶見之
而寬大無所不容居室器用不尚華侈衣服純素食無
珍異愛人好施振恤急難親族之貧者多賴焉英宗入
居儲宮委王調護神宗習之世務意甚勤切德國在堂
王祿未豐顯怡顏養志服御玩好凡可以順適其心者

罄其所有無所不為英宗雅稱王篤孝德國病逾歲王
晝夜省視席不安寢衣不緩帶灼臂禱請無所不至卒
不起居喪哀毀徒跣扶柩以至墓所表乞廬墓終制天
子雖奪情不許深嘉嘆之自德國薨不邇聲色獨居靜
處出侍妾數十人元豐中從幸瓊林苑命射一發中的
神宗稱賞賜與甚厚神宗不豫王處一室憂見于色外
人不得入者月餘聞宮車晏駕號慟不食感疾失語踰
年稍復自支常追懷神宗眷遇之厚雖久而哀不忘居

家歲時祭享必先期處別室齋潔累日然後行事恭恪
無少惰燕閒諸子侍左右教以忠孝皂隸有過必三犯
然後罰閨門上下雍睦嚴整宗室親戚多指以為法喜讀
左氏春秋歷代史書晚年無疾方食于正寢神色精明如
平日忽不語少頃而薨年五十有六實元祐三年五月
癸亥訃聞天子震悼輟視朝三日制服苑中哭之百官
慰于崇政殿門太皇太后同臨奠恤其孤恩意甚厚歸
賵賻別賜金帛加等贈太師追封崇王謚曰孝溫命入

內省押班梁惟簡內供奉官劉永年入內省高品季祁
護喪事六月甲午具鹵簿鼓吹出殯于城北乾元福聖
佛祠王先娶彭氏武昌軍節度使眷之孫女封英國夫
人今正室劉氏昭化軍節度觀察留後與之孫女封嘉
國六男曰仲伊右監門率府率早卒曰仲詰右武衛大
將軍永州

闕

譚曰仲諱皆右千牛衛將軍十女長壽縣主適東頭供
奉官任懷亮太康縣主適內殿宗班徐珪秀容縣主適

文思副使程達卒永寧縣主適西頭供奉官胡天經和
義郡君適西頭供奉官周軫卒遂寧郡君適右侍禁夏
悅同安郡君適左侍禁彭詢長樂郡君適右侍禁翟士
永文安郡君適右班殿直周涇次在室孫男十人士崇
左班殿直士邁右班殿直士苛士碌皆卒士灑士仇右
班殿直四人未名女八人長早亡餘幼九年二月己酉
從太皇太后之喪葬於河南永安縣永裕陵之西銘曰
太宗諸孫安懿多子英宗承統藩國奉祀於穆崇王宗

邨稱賢治平之初有命自天帝曰嗟予伯仲叔季咸造
內朝以慰予志神宗嗣服濮屬攸尊大啓土宇並王而
藩惟是崇王協贊帝德英宗所託神考是翼上之光宅
惇敘九宗將旄相印益以附庸生有顯榮沒有令譽從
葬西陵利其後嗣

楚州防禦使楚國公贈奉國軍節度使夫人宋
氏墓誌銘

夫人宋氏開封人曾祖龜贈太師中書令尚書令祖臯

贈太師中書令尚書令譙國公考綏西頭供奉官母張氏伯父綬參知政事年十七歸楚州防禦使楚國公世恩封永康縣君夫人奉舅姑恭順接娣姒以和撫諸子均一元祐八年五月二十四日卒年五十有二八男曰令勔右武衛大將軍濠州刺史次未名而亡曰令璪右侍禁曰令勸曰令覲並左班殿直曰令庑右班殿直早卒曰令瑀左班殿直曰令剔右班殿直早卒九女長適故右班殿直宋安國次早卒次適右侍禁范湍卒次適

陳州司法參軍吳環卒次三人早卒次二人尚幼孫男
十二人子禔三班奉職子禔右千牛衛將軍襲封楚國
公子禔三班奉職子禔早卒子祿子稜子球子禔子琰
子禔未仕二人幼孫女十人四人早卒六人幼九年二
月己酉葬河南永安縣銘曰

遠矣宋氏有商之裔宋在今朝世德孔昭懿哉夫人終
始惟一載其令淑有銘斯石

左侍禁妻郭氏墓誌銘

君郭氏開封人後徙家許州今為潁昌人曾祖榮祖澄
贈左千牛衛大將軍考瓌左藏庫使母長安縣君李氏
君生數歲已能承順父母顏色既長喪父白其母曰不
幸早孤劬勞無所報惟是不嫁以終養母母兄不能抑
處室二十三歲宗室士臬聞其孝行嘆曰吾母亦寡居
歲久幼弟未昏若得此女為婦使娣姒共奉甘旨豈不
善歟遣行媒力請于長安君長安君感其意奪君志而
嫁之遂適士臬弟左侍禁士炆贈虔州觀察使仲行第

三子也入見禁中賜霞帔服君既嫁果能事姑與兄公
恭恪盡禮閨門雍穆上下欣悅然未嘗須臾忘母思念
感疾元祐三年十一月十一日卒年二十有四一子後
三歲未賜名亦卒九年二月己酉葬河南永安縣銘曰
處為孝女歸為孝婦雖則有行終念其母銘以昭之純
孝之墓

右監門衛大將軍贈洺州防禦使追封廣平侯

墓誌銘

侯諱令攀字子高贈保靜軍節度觀察留後高平郡公
惟敘之曾孫贈同州觀察使齊國公從貺之孫耀州管
內觀察使世逸之子侯幼而奇警記誦文字一見如宿
習比既長嚴于禮法動靜周旋容止必肅衣冠必正母
和義郡夫人疾篤醫有難色公刲股為羹以進母疾隨
愈仁宗為育宗子聞侯幼敏賜以飛白小字宗室榮之
初賜名補太子右內率府副率歷右監門率府率千牛
衛將軍右監門衛大將軍元祐五年某月甲辰卒年三